

## PRSTENI I IDEALI

1. Neka je  $x$  nilpotentan element prstena  $A$ . Dokazati da je  $1+x$  invertibilan element prstena  $A$ . Odatle zaključiti da je suma nilpotentnog i invertibilnog elementa invertibilan element.

Rješenje:

Neka je  $x$  nilpotentan element. To znači da postoji prirodan broj  $n$  takav da je  $x^n = 0$ . Neka je  $n$  najmanji prirodan broj sa ovom osobinom. Kako je

$$1 = 1 + (-1)^{n-1} x^n = (1+x)(1-x+x^2-\dots+(-1)^{n-1} x^{n-1})$$

vidimo da je  $(1-x+x^2-\dots+(-1)^{n-1} x^{n-1}) \in A$  inverzni element elementa  $1+x$  tj.  $1+x$  je jedinica prstena  $A$ .

Neka je sada  $a \in A$  jedinica što zanči da postoji  $a^{-1} \in A$  takvo da je  $aa^{-1} = 1$ . Posmatrajmo element  $a+x$ . Imamo da je

$$a^n = a^n + (-1)^{n-1} x^n = (a+x)(a^{n-1} - a^{n-2} x + \dots + (-1)^{n-1} x^{n-1}), \text{ tj.}$$

$$1 = (x+a)(a^{-n}(a^{n-1} - a^{n-2} x + \dots + (-1)^{n-1} x^{n-1})).$$

Dakle,  $a+x$  je jedinica prstena  $A$ , a kako je  $a$  bio proizvoljan invertibilan element iz  $A$  zaključujemo da je zbir jedinice i nilpotenta jedinica prstena.

2. Neka je  $A$  prsten, a  $A[x]$  prsten polinoma sa koeficijentima iz  $A$  u promjenljivoj  $x$ . Neka je  $f = a_0 + a_1 x + a_2 x^2 + \dots + a_n x^n$ . Dokazati sljedeća tvrđenja:

a)  $f$  je jedinica u  $A[x] \Leftrightarrow a_0$  je jedinica u  $A$ , a  $a_1, a_2, \dots, a_n$  su nilpotentni.

b)  $f$  je nilpotentan  $\Leftrightarrow a_0, a_1, \dots, a_n$  su nilpotentni.

c)  $f$  je djelitelj nule  $\Leftrightarrow$  postoji nenulti element iz  $a \in A$  takav da je  $af = 0$ .

d) Polinom  $f$  zovemo primitivnim ako je  $(a_0, a_1, \dots, a_n) = 1$ . Pokazati da je  $fg$  primitivan polinom ako i samo ako su  $f$  i  $g$  primitivni polinomi.

Rješenje:

- a) Prepostavimo da je  $f$  invertibilan element prstena  $A[x]$  i neka je  $g = b_0 + b_1 x + \dots + b_m x^m$  takav da je  $fg = 1$ . Iz  $fg = 1$  neposredno slijedi da je  $a_0$  jedinica prstena  $A$ . Takođe, iz  $fg = 1$  slijedi i

$$a_n b_m = 0$$

$$a_n b_{m-1} + a_{n-1} b_m = 0 / \cdot a_n$$

$$a_n^2 b_{m-1} + a_{n-1} a_n b_m = 0 \text{ tj. } a_n^2 b_{m-1} = 0$$

Dalje iz  $a_n b_{m-2} + a_{n-1} b_{m-1} + a_{n-2} b_m = 0 \cdot a_n^2$  dobijamo  $a_n^3 b_{m-2} = 0$ .

Nastavljajući ovako, dobili bi  $a_n^{m-1} b_0 = 0$ , što zbog  $b_0 \neq 0$  znači da je  $a_n^{m-1} = 0$ . Dakle,  $a_n$  je nilpotentan element.

Prepostavimo sada da je  $a_i$  nilpotentno za  $k < i \leq n$ , gdje je  $k$  prirodan broj manji od  $n$ .

Posmatrajmo sada koeficijent uz  $x^{m+k}$  tj. posmatrajmo  $a_k b_m + a_{k+1} b_{m-1} + \dots + a_n b_{m+k-n}$ . Kako je skup svih nilpotentnih elemenata prstena  $A$  ideal prstena (označit ćemo ga sa  $N(A)$ ), to je

$a_k b_m \in N(A)$ . Iz  $a_{k-1} b_m + a_k b_{m-1} + \dots + a_n b_{m+k-1-n}$ , zaključujemo da je i

$a_{k-1} b_m + a_k b_{m-1} \in N(A)$ , a sada imamo da je

$a_k (a_k b_{m-1} + a_{k-1} b_m) = a_k^2 b_{m-1} + a_{k-1} a_k b_m \in N(A)$ , što konačno, znači da je  $a_k^2 b_{m-1} \in N(A)$ .

Nastavljajući ovaj postupak dalje, iz  $a_k b_0 + a_{k-1} b_1 + \dots + a_n b_{n-k}$  zaključujemo da

$a_k^{m+1} b_0 \in N(A)$ . Množenjem sa  $a_0$ , imajući u vidu da je  $a_0 b_0 = 1$ , dobijamo  $a_k^{m+1} \in N(A)$ , tj. da  $a_k \in N(A)$ .

Kako je  $k$  bio proizvoljan prirodan broj manji od  $n$ , zaključujemo da su  $a_n, a_{n-1}, \dots, a_1$  nilpotentni elementi prstena  $A$ .

Obrnuto, prepostavimo li da su  $a_n, a_{n-1}, \dots, a_1$  nilpotentni, a  $a_0$  invertibilno, tada iz činjenice da je  $a_1 x + a_2 x^2 + \dots + a_n x^n$  nilpotentan element prstena  $A[x]$  i zadatka 1 zaključujemo da je  $f$  invertibilno.

b) Prepostavimo da je  $f \in A[x]$  nilpotentan. To znači da je  $a_0$  nilpotentan element prstena  $A$ , pa je prema zadatu 1,  $1 + a_0$  invertibilan element u  $A$ . Iz upravo dokazane tvrdnje pod a) (ako umjesto polinoma  $f$  uzmemos polinom  $f + 1$ ) zaključujemo da su  $a_n, a_{n-1}, \dots, a_1$  nilpotentni. Dakle,  $a_0, a_1, a_2, \dots, a_n$  su nilpotentni elementi prstena  $A$ .

Obrnuto. Prepostavimo da su  $a_0, a_1, a_2, \dots, a_n$  nilpotentni elementi prstena  $A$ . Kako je za svaki nilpotent  $a \in A$  i svako  $n \in N$   $ax^n \in A[x]$  nilpotentan element, a zbir nilpotentnih elemenata je opet nilpotentan element, zaključujemo da je i polinom  $f$  nilpotentan.

c) Neka je  $f$  netrivijalan djelitelj nule prstena  $A[x]$  i neka je  $g = b_0 + b_1 x + \dots + b_m x^m \in A[x]$  polinom najnižeg stepena za koji je  $fg = 0$ . Jasno,  $b_m \neq 0$ . Iz  $fg = 0$  slijedi da je  $a_n b_m = 0$ .

$a_n g = 0$ , jer bi u suprotnom postojao polinom  $h = a_n g$  stepena manjeg od  $m$  ( $\deg(a_n g) < m$ ) i takav da je  $fh = 0$  što nije moguće. Prepostavimo da je  $a_i g = 0$  za sve  $i = n, \dots, k-1$ . Ako bi bilo  $a_k g \neq 0$ , onda bi vrijedilo  $fa_k g = 0$  i  $\deg(a_k g) < m$ , što je nemoguće. Dakle  $a_i g = 0$  za  $i = 0, \dots, n$ . Kako je  $b_m \neq 0$ , a iz  $a_i g = 0$  slijedi da je  $a_i b_m = 0$  za  $i = 0, \dots, n$ , to je  $b_m f = 0$ . Očigledno: ako postoji nenulti element  $a \in A$  za koji je  $af = 0$  onda je  $f$  djelitelj nule prstena  $A[x]$  ( $a$  je nenulti element i u  $A[x]$ ).

d) Neka su  $f = a_0 + a_1 x + \dots + a_n x^n$  i  $g = b_0 + b_1 x + \dots + b_m x^m$  primitivni polinomi i neka je  $fg = c_0 + c_1 x + \dots + c_{m+n} x^{m+n}$ , gdje je  $c_k = \sum_{k=i+j} a_i b_j$ ,  $k = 0, 1, \dots, m+n$ .

Pretpostavimo da proizvod  $fg$  nije primitivan polinom, tj. da postoji cijeli broj  $d \neq 1$  takav da  $d | c_k$  za sve  $k = 0, 1, \dots, m+n$ . Pošto su  $f$  i  $g$  primitivni polinomi postoje  $i \in \{0, 1, \dots, n\}$  i  $j \in \{0, 1, \dots, m\}$  takvi da  $d | a_k$  ( $\forall k = 0, 1, \dots, i-1$ ),  $d | b_i$  i  $d | b_k$  ( $\forall k = 0, 1, \dots, j-1$ ),  $d | b_j$ . Po pretpostavci je element  $c_{i+j}$  djeljiv sa  $d$ . Međutim,  $c_{i+j} = \sum_{k < i} a_k b_{i+j-k} + \sum_{k > i} a_k b_{i+j-k} + a_i b_j$ . Svaki sabirak prve sume je djeljiv sa  $d$ , jer je  $k < i$ , a i svaki sabirak druge sume, jer je  $i+j-k < j$ . Treći sabirak nije djeljiv sa  $d$ , pa nije ni  $c_{i+j}$  što je kontradikcija sa našom pretpostavkom. Dakle, polinom  $fg$  je primitivan.

Obrnuto, pretpostavimo da je polinom  $fg$  primitivan, a da jedan od polinoma npr.  $f$  nije. To bi značilo da postoji cijeli broj  $d \neq 1$  i takav da  $d | a_k$  ( $\forall k = 0, 1, \dots, n$ ), a tada bi postojao i polinom  $h$  takav da je  $f = dh$ . Ovo bi značilo da je  $fg = dhg$  tj. da  $d | c_k$   $k = 0, 1, \dots, m+n$  što je u kontradikciji sa pretpostavkom da je  $gf$  primitivan. Dakle, i polinomi  $f$  i  $g$  su primitivni.

### 3. Dokazati da je u prstenu $A[x]$ Jacobsonov radikal jednak nilradikalu.

Rješenje: Da je nilradikal sadržan u Jacobsonovom radikalu jasno je, jer je nilradikal presjek prostih, Jacobsonov radikal presjek maksimalnih ideaala, a svaki maksimalan ideal je prost. Dakle,  $N(A[x]) \subseteq J(A[x])$ . Dokažimo i obrnutu inkluziju. Neka je  $f \in J(A[x])$ . Za svako  $g \in A[x]$  polinom  $1 - fg$  je invertibilan (propozicija 1.9.), pa je invertibilan i za  $g = x$ . Znači, polinom  $1 - fx = 1 - a_0x - a_1x^2 - \dots - a_nx^{n+1}$  je jedinica prstena  $A[x]$ , a prema prethodnom zadatku a) odatle slijedi da su  $a_0, a_1, \dots, a_n$  nilpotentni. Sada, opet na osnovu zadatka 2 b) imamo da je  $f$  nilpotentan, tj. da  $f \in N(A[x])$ . Dakle,  $N(A[x]) = J(A[x])$ .

### 4. Neka je $A[[x]]$ prsten formalnih redova potencija nad prstenom $A$ , tj. skup svih elemenata oblika $\sum_{n=0}^{\infty} a_n x^n$ ( $a_n \in A$ ) u kome se računa ovako:

$$\begin{aligned} \sum_{n=0}^{\infty} a_n x^n &= \sum_{n=0}^{\infty} b_n x^n \Leftrightarrow a_n = b_n \quad (n = 0, 1, \dots) \\ \sum_{i=0}^{\infty} a_i x^i + \sum_{j=0}^{\infty} b_j x^j &= \sum_{k=0}^{\infty} (a_k + b_k) x^k \\ \sum_{i=0}^{\infty} a_i x^i \cdot \sum_{j=0}^{\infty} b_j x^j &= \sum_{k=0}^{\infty} \left( \sum_{i+j=k} a_i b_j \right) x^k \end{aligned}$$

Dokazati:

- a)  $f$  je jedinica u  $A[[x]]$  ako i samo ako je  $a_0$  jedinica u  $A$
- b)  $f$  je nilpotentno ako i samo ako je  $a_n$  nilpotentno ( $n = 0, 1, \dots$ )
- c)  $f$  je u Jacobsonovom radikalu prstena  $A[[x]]$  ako i samo ako je  $a_0$  u Jacobsonovom radikalu prstena  $A$

- d) Kontrakcija  $m^c$  maksimalnog idealja  $m$  prstena  $A[[x]]$  je maksimalni ideal prstena  $A$ , a ideal  $m$  je generisan sa  $m^c$  i  $x$ .  
e) Svaki prosti ideal prstena  $A$  je kontrakcija nekog prostog idealja prstena  $A[[x]]$ .

Rješenje:

- a) Pretpostavimo da je  $f = \sum_{n=0}^{\infty} a_n x^n$  invertibilan element prstena  $A[[x]]$ , tj. pretpostavimo da postoji  $g = \sum_{n=0}^{\infty} b_n x^n$  takvo da je  $fg = 1$ . Po definiciji množenja elemenata prstena  $A[[x]]$  imamo da je  $a_0 b_0 = 1$ , što znači da je  $a_0$  jedinica prstena  $A$ . Obrnuto, pretpostavimo da je  $a_0$  jedinica prstena  $A$ . Da bi  $f$  bio invertibilan u  $A[[x]]$  mora postojati  $g \in A[[x]]$  takvo da je  $fg = 1$ . To bi značilo da koeficijenti  $b_0, b_1, \dots$  moraju zadovoljavati sistem jednačina  $a_0 b_0 = 1$

$$\begin{aligned} a_0 b_1 + a_1 b_0 &= 0 \\ a_0 b_2 + a_1 b_1 + a_2 b_0 &= 0 \\ &\vdots \\ a_0 b_n + a_1 b_{n-1} + \dots + a_n b_0 &= 0 \\ &\vdots \end{aligned}$$

Dokažimo indukcijom da ovaj sistem ima rješenje po  $b_0, b_1, \dots$ . Da je tvrđenje tačno za  $n = 0$  slijedi neposredni iz pretpostavke. Pretpostavimo da smo izračunali  $b_0, b_1, \dots, b_n$ . Tada je  $b_{n+1} = -a_0^{-1}(a_1 b_n + \dots + a_{n+1} b_0)$ , pa za  $f$  postoji inverzni element  $g$ , tj.  $f$  je jedinica prstena  $A[[x]]$ .

- b) Pretpostavimo da je  $f$  nilpotentno. Odатле neposredno slijedi da je  $a_0$  nilpotentno, pa je nilpotentno i  $f - a_0$ , što znači da je nilpotentno i  $a_1$ , itd... Pretpostavimo da su  $a_0, a_1, \dots, a_n$  nilpotentni. Tada je i  $f - (a_0 + a_1 x + \dots + a_n x^n)$  nilpotentno, pa je nilpotentno i  $a_{n+1}$ . Po principu matematičke indukcije zaključujemo da je  $a_i$  nilpotentno  $\forall i = 0, 1, 2, \dots$ . Obrnuto, neka su  $a_0, a_1, \dots$  nilpotentni. Tada su nilpotentni i elementi  $a_0, a_1 x, a_2 x^2, \dots$  pa je nilpotentna i njihova suma, tj.  $f$  je nilpotentno.

- c) Pretpostavimo da je  $f$  u Jacobsonovom radikalu prstena  $A[[x]]$ . To znači da je  $1 - fg$  invertibilno za svako  $g \in A[[x]]$ , pa i za  $g = 1$ . Prema dokazanom pod a) imamo da je  $1 - a_0 b_0$  invertibilno, što opet prema propoziciji 1.9. znači da je  $a_0$  u Jacobsonovom radikalu prstena  $A$ .

Obrnuto, ako je  $a_0$  u Jacobsonovom radikalu prstena  $A$  onda je  $1 - a_0 b_0$  invertibilno za svako  $b_0 \in A$ , pa je prema a)  $1 - fg$  invertibilno za svako  $g \in A[[x]]$  tj.  $f$  je u Jacobsonovom radikalu prstena  $A[[x]]$ .

- d) Neka je  $m$  maksimalan ideal prstena  $A[[x]]$ . Pokažimo najprije da je  $x \in m$ . Ako ovo ne bi bilo tačno onda bi imali da je  $m + (x) \supset m$ , a kako je  $m$  maksimalan ideal to je

$m + (x) = A[[x]]$ .  $0 \in m$  pa postoji  $g \in A[[x]]$  takvo da je  $xg = 1$ . Ovo je nemoguće, pa prema tome,  $x \in m$ . Neka je sada  $f = \sum_{n=0}^{\infty} a_n x^n \in m$  proizvoljno. Zbog  $x \in m$  imamo da  $a_0 \in m$ , a kako je  $a_0 = f^{-1}(a_0)$  to  $a_0 \in m^c$ . Prepostavimo da  $m^c$  nije maksimalan ideal, tj. prepostavimo da postoji ideal  $\alpha \subseteq A$  takav da je  $\alpha \neq A$  i  $m^c \subset \alpha$ . Neka je  $b \in \alpha \setminus m^c$ .  $f(b) \in A[[x]] \setminus m$ , pa je  $(f(b)) + m = A[[x]]$  (jer je  $m$  maksimalan). Odavde zaključujemo da postoji  $f \in A[[x]]$  takvo da je  $bf = 1$ , što je nemoguće jer  $b$  nije invertibilno. Dakle,  $m^c$  je maksimalan ideal prstena  $A$ . Očigledno je  $m$  generisano sa  $m^c$  i  $x$ .

- e) Neka je  $\gamma$  prost ideal prstena  $A$ . Posmatrajmo ideal  $\bar{\gamma}$  prstena  $A[[x]]$  generisan sa  $\gamma$  i  $x$  i pokažimo da je  $\bar{\gamma}$  prost ideal. Neka je  $fg \in \bar{\gamma}$ . Odavde slijedi da  $a_0 b_0 \in \gamma$ , a  $\gamma$  je prost, pa je  $a_0$  ili  $b_0$  iz  $\gamma$ . Neka je  $a_0 \in \gamma$ . Zbog  $a_0, x \in \bar{\gamma}$  zaključujemo da  $f \in \bar{\gamma}$ , što znači da je  $\bar{\gamma}$  prost ideal prstena  $A[[x]]$ . Jasno je da je  $f^{-1}(\bar{\gamma}) = \gamma$  tj. da je  $\gamma = \gamma^c$ , čime smo pokazali da je svaki prost ideal prstena  $A$  kontrakcija nekog prostog idealisa prstena  $A[[x]]$ .

5. Neka je  $A$  prsten čiji svaki ideal koji nije sadržan u nilradikalu sadrži nenultu idempotentnu (tj. element  $e$  sa osobinom  $e^2 = e \neq 0$ ). Dokazati da se nilradikal i Jacobsonov radikal prstena  $A$  podudaraju.

Rješenje:

Da je nilradikal sadržan u Jacobsonovom radikalu, jasno je jer je nilradikal presjek svih prostih idealova, Jacobsonov radikal presjek svih maksimalnih idealova, a svaki maksimalan ideal je prost.

Dokažimo da vrijedi i obrnuto tj. da je Jacobsonov radikal  $J(A)$ , sadržan u nilradikalu  $N(A)$ .

Ako ovo ne bi bilo tačno onda bi Jacobsonov radikal, po prepostavci zadatka, sadržavao nenultu idempotentnu  $e$  koja ne pripada nilradikalu. Ovo bi značilo da je  $1 - ex$  invertibilno  $\forall x \in A$ , pa i za  $x = 1$ . Dakle, postoji  $a \in A$  takvo da je

$$(*) \quad a(1 - e) = 1.$$

Sa druge strane, zbog,  $e^2 = e$ , imamo da je  $e(1 - e) = 0$ . Množenjem posljednje jednakosti sa  $a$  i imajući u vidu  $(*)$ , dobijamo da je  $e = 0$  što je u kontradikciji sa prepostavkom. Dakle,  $J(A) \subseteq N(A)$ . Iz svega rečenog, konačno zaključujemo da je  $J(A) = N(A)$ .

6. Neka je  $A \neq \{0\}$  prsten. Dokazati:

- a) Skup svih prostih idealova prstena  $A$  ima minimalni element u odnosu na relaciju inkluzije;
- b) Za svaki ideal  $\alpha \neq (1)$  prstena  $A$  postoji bar jedan minimalni prosti ideal  $\beta$  koji sadrži  $\alpha$ .

Rješenje:

a) Pokažimo da je skup  $\Sigma$ , svih prostih ideaala prstena  $A$  induktivno uređen relacijom  $\supseteq$ .

Neka je  $\{\alpha_i\}_{i \in I}$  lanac skupa  $\Sigma$ . Pokažimo da je  $i \bigcap_{i \in I} \alpha_i$  prost ideal, tj. da pripada skupu  $\Sigma$ .

Neka je  $ab \in \bigcap_{i \in I} \alpha_i$  i neka  $b \notin \bigcap_{i \in I} \alpha_i$ . Ovo znači da postoji  $k \in I$ , takvo da  $b \notin \alpha_k$ , a kako je  $\alpha_k$  prost ideal i  $ab \in \alpha_k$  to onda  $a \in \alpha_k$ , pa  $a \in \alpha_i$  za sve  $i \leq k$ . Međutim, kako  $b \notin \alpha_k$ , to  $b \notin \alpha_i (\forall i > k)$ , a svaki od ideaala  $\alpha_i$  je prost i sadrži  $ab$ , što znači da  $a \in \alpha_i$  i za sve  $i > k$ . Dakle,  $a \in \bigcap_{i \in I} \alpha_i$ , pa  $\bigcap_{i \in I} \alpha_i \in \Sigma$ . Po Zornovoj lemi postoji bar jedan minimalni element skupa  $\Sigma$ , tj. postoji bar jedan minimalni prosti ideal prstena  $A$ .

b) Posmatrajmo prsten  $B = A/\alpha$ . Prema prethodno dokazanom, pod a), postoji minimalni prosti ideal prstena  $B$ . Neka je to  $\bar{\beta}$ . Sada je  $\beta = \{x \in A : f(x) \in \bar{\beta}\}$  minimalni prosti ideal prstena  $A$  koji sadrži  $\alpha$ .

7. Neka je  $\alpha \neq (1)$  ideal prstena  $A$ . Dokazati:

$$r(\alpha) = \alpha \Leftrightarrow \alpha \text{ je presjek prostih ideaala.}$$

Rješenje:

Neka je  $\alpha$  presjek prostih ideaala prstena  $A$ . Jasno je da je  $\alpha \subseteq r(\alpha)$ . Pokažimo da je i  $r(\alpha) \subseteq \alpha$ . Neka je  $x \in r(\alpha)$ , tj. neka je  $x^n \in \alpha$  za neki prirodan broj  $n$ .  $\alpha$  je presjek prostih ideaala, pa je prema tome  $x^n$  sadržano i u svakom prostom idealu, što znači da je i  $x$  sadržano u svakom pomenutom prostom idealu, pa i u njihovom presjeku. Dakle,  $r(\alpha) \subseteq \alpha$ , što konačno znači da je  $r(\alpha) = \alpha$ .

Obrnuto, prepostavimo da je  $r(\alpha) = \alpha$ .  $r(\alpha)/\alpha$  je nilradikal prstena  $A/\alpha$ , tj.  $r(\alpha)/\alpha$  je presjek svih prostih ideaala prstena  $A/\alpha$ , pa je i  $r(\alpha) = \alpha$  presjek prostih ideaala prstena  $A$ .

8. Neka je  $N$  nilradikal prstena  $A$ . Dokazati da su sljedeći uslovi međusobno ekvivalentni:

- a)  $A$  ima tačno jedan prost ideal;
- b) Svaki element iz  $A$  je invertibilan ili nilpotentan;
- c)  $A/\alpha$  je polje.

Rješenje:

$$a) \Rightarrow b)$$

Prepostavimo da prsten  $A$  ima tačno jedan prost ideal  $\alpha$ , a kako je svaki maksimalan ideal prost, ovo znači da prsten  $A$  ima i samo jedan maksimalan ideal  $\alpha$ , pa je  $J(A) = N(A) = \alpha$ . Neka je  $a \in A$  proizvoljno. Ako  $a$  nije invertibilno, onda je prema posljedici 1.5. sadržano u maksimalnom idealu  $\alpha = N(A)$ , što znači da je  $a$  nilpotentno.

$$b) \Rightarrow c)$$

Prepostavimo da je svaki element prstena  $A$  ili invertibilan ili nilpotentan. Posmatrajmo prsten  $A/N(A)$ . Neka je  $f : A \rightarrow A/N(A)$  i neka je  $a + N(A)$  nenulti element prstena

$A/N(A)$ . Pošto  $a \notin N(A)$ ,  $a$  je invertibilno, pa postoji  $b \in A$  takvo da je  $ab = 1$ . Sada je i  $f(a)f(b) = (a + N(A))(b + N(A)) = 1 + N(A)$ , što znači da je  $a + N(A)$  invertibilno. Dakle,  $A/N(A)$  je polje.

c)  $\Rightarrow a)$

Pretpostavimo da je  $A/N(A)$  je polje. Neka je  $\alpha$  proizvoljan prost ideal prstena  $A$ .  $N(A) \subseteq \alpha$  jer je  $N(A)$  presjek prostih idealova. Ideal  $f(\alpha)$  prstena  $A/N(A)$  je je ili (0) ili (1) ( $f$  je prirodni epimorfizam). Ako je  $f(\alpha) = (0)$  onda je  $\alpha = N(A)$ , a ako je  $f(\alpha) = (1)$  onda je  $\alpha = A$ . Drugi slučaj je nemoguć, pa je prema tome  $\alpha = N(A)$ . Kako je  $\alpha$  bio proizvoljan prost ideal prstena  $A$  zaključujemo da je  $\alpha = N(A)$  i jedini prost ideal prstena  $A$ .

9. Prsten  $A$  zove se Boolov prsten, ako vrijedi  $x^2 = x (\forall x \in A)$ . Dokazati da u Boolovom prstenu vrijedi :

- a)  $2x = 0$
- b) Svaki prosti ideal  $\gamma$  prstena  $A$  je maksimalan, a  $A/\gamma$  je polje sa dva elementa
- c) Svaki ideal generisan konačnim skupom je glavni.

Rješenje:

a)  $(x+x)^2 = x+x$ , a sa druge strane imamo da je

$$(x+x)^2 = x^2 + x^2 + x^2 + x^2 = x+x+x+x.$$

Znači,  $x+x+x+x = x+x$ , tj.  $2x = 0$ .

b) Neka je  $\gamma$  prost ideal prstena  $A$ . Pokažimo da je  $\gamma$  maksimalan.  $A/\gamma$  je oblast cijelih. Neka je  $f : A \rightarrow A/\gamma$  prirodni epimorfizam i  $x \in A$  proizvoljno ali takvo da je  $f(x) \neq 0$ . I u prstenu  $A/\gamma$  takođe važi  $(f(x))^2 = f(x)$ , pa je  $f(x)(f(x) - \bar{1}) = \bar{0}$ . Kako je  $f(x) \neq 0$  i  $A/\gamma$  oblast cijelih, to mora biti  $f(x) = \bar{1}$ . Znači,  $A/\gamma$  je polje, pa je  $\gamma$  maksimalan ideal prstena  $A$ . Jasno je da polje  $A/\gamma$  ima samo dva elementa, klase  $\bar{1}$  i  $\bar{0}$ .

c) Pretpostavimo da je  $\alpha$  konačno generisan ideal prstena  $A$ . Neka je, najprije, ideal  $\alpha$  generisan sa dva elementa tj, neka je  $\alpha = (a_1, a_2)$ . Posmatrajmo proizvod  $(a_1+1)(a_2+1) = a_1a_2 + a_1 + a_2 + 1$ . Ako stavimo  $b = a_1a_2 + a_1 + a_2 + 1$  onda je  $b \in \alpha$ , pa je i  $(b) \subseteq \alpha$ . Za  $a_i (i=1,2)$  vrijedi  $a_i(b+1) = a_i(a_1a_2 + a_1 + a_2 + 1) = 0$  (jer je  $a_i^2 = a_i$  i  $2a_i = 0$ ,  $i=1,2$ ). Neka je  $x \in \alpha$  proizvoljno. Tada je  $x = x_1a_1 + x_2a_2$  gdje  $x_1, x_2 \in A$ . Sada imamo  $x = x_1a_1 + x_2a_2 + x_1a_1(1+b) + x_2a_2(1+b) = (x_1a_1 + x_2a_2)b$ , što znači da je  $x \in (b)$ . Zbog proizvoljnosti  $x$  zaključujemo da je  $\alpha = (b)$ , tj. da je  $\alpha$  glavni ideal. Ako sad pretpostavimo da je  $\alpha = (a_1, a_2, \dots, a_n)$  i stavimo  $1+b = (1+a_1)(1+a_2)\dots(1+a_n)$ , onda bi razmišljajući na isti način kao u prethodnom slučaju zaključili da je  $\alpha = (b)$ , tj da je  $\alpha$  glavni ideal.

**10.** Dokazati da lokalni prsten ne sadrži drugih idempotenti osim 0 i 1.

Rješenje:

Neka je  $e$  idempotenta prstena  $A$ . Iz  $e^2 = e$  imamo da je  $e(e-1) = 0$ . Prsten  $A$  je po pretpostavci, lokalni pa ima samo jedan maksimalan ideal  $m$  koji je, naravno, prost i sadrži 0. Znači  $e(e-1) \in m$  pa imamo da ili  $e \in m$  ili  $e-1 \in m$  (oboje ne vrijedi istovremeno jer bi tada imali da je  $m = (1)$ ). Iz ovoga zaključujemo da je ili  $e$  ili  $e-1$  invertibilno. U prvom bi slučaju imali da je  $e = 1$ , a u drugom  $e = 0$ . Dakle, prsten  $A$  nema drugih nilpotentnih elemenata osim 0 i 1.

**11.** Neka je  $A$  prsten u kome svaki element  $x$  ispunjava uslov  $x^n = 1$  za neko  $n > 1$  (koje zavisi od  $x$ ). Dokazati da je svaki prosti ideal prstena  $A$  maksimalan.

Rješenje:

Neka je  $\gamma$  prost ideal prstena  $A$ .  $A/\gamma$  je domen integriteta. Neka je  $f : A \rightarrow A/\gamma$  prirodni epimorfizam. Po pretpostavci za svako  $x \in A$  postoji prirodan broj  $n$  takav da je  $x^n = 1$ , a to znači da i za svako  $f(x) \in A/\gamma$ ,  $f(x) \neq 0$  postoji prirodan broj  $n$  takav da je  $f(x^n) = (f(x))^n = \bar{1}$ . Ovo zapravo, znači da je svaki nenulti element prstena  $A/\gamma$  invertibilan. Dakle, prsten  $A/\gamma$  je polje a ideal  $\gamma$  je maksimalan.

**12.** Neka je  $\Sigma$  skup svih ideaala prstena  $A$  u kojima je svaki element djelitelj nule. Dokazati da  $\Sigma$  ima maksimalni element i da je svaki maksimalni element iz  $\Sigma$  prost ideal. Prema tome, skup djelitelja nule prstena  $A$  je unija prostih ideaala.

Rješenje:

Skup  $\Sigma$  je induktivno uređen relacijom inkluzije. Naime, ako je  $\{\alpha_i\}_{i \in I}$  lanac ideaala prstena  $A$ , tada je  $\alpha = \bigcup_{i \in I} \alpha_i$  ideal iz  $\Sigma$ , jer je svaki element iz  $\alpha$  djelitelj nule. Prema Zornovoj lemi skup  $\Sigma$  ima maksimalni element. Pokažimo da je svaki element iz  $\Sigma$  prost ideal. Neka je  $\alpha \in \Sigma$  i neka  $ab \in \alpha$ . Odavde slijedi da postoji  $x \neq 0$  i takav da je  $(ab)x = 0$ . No, tada je i  $a(bx) = 0$ , pa ako je  $bx \neq 0$  onda  $a \in \alpha$ , a ako je  $bx = 0$  onda  $b \in \alpha$ . Dakle,  $\alpha$  je prost ideal prstena  $A$ .